

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 16, No. 686

原始資料: 蕭鎮國大德提供, 維習安大德提供之高麗藏 CD 經文, 北美某大德提供

No. 686 [No. 685]

佛說報恩奉盆經(亦云報像功德經)

闕譯附東晉錄

聞如是。一時佛在舍衛國祇樹給孤獨園。大目犍連始得六通。欲度父母報乳哺之恩。即以道眼觀視世界。見其亡母生餓鬼中。不見飲食皮骨相連柱。目連悲哀即鉢盛飯往餉其母。母得鉢飯。便以左手障飯右手搏食。食未入口化成火炭遂不得食。目連馳還白佛。具陳如此。佛告目連。汝母罪根深結。非汝一人力所奈何。當須眾僧威神之力。乃得解脫。吾今當說救濟之法。令一切難皆離憂苦。

佛告目連。七月十五日當為七世父母在厄難中者。具麩飯五果汲灌瓮器。香油庭燭床榻臥具。盡世甘美以供養眾僧。當此之日。一切聖眾或在山間禪定。或得四道果。或樹下經行。或得六通飛行。教化聲聞緣覺。菩薩大人權示比丘在大眾中。皆共同心受鉢和羅。具清淨戒聖眾之道其德汪洋。其有供養此等之眾。七世父母五種親屬。得出三塗應時解脫衣食自然。佛勅眾僧。當為施主家七世父母。行禪定意然後食此供。目連比丘及一切眾歡喜奉行。

佛說報恩奉盆經